

16—18-րդ դարերի ՀԱՅ ԱԶԱՏԱԳՐԱԿԱՆ ՇԱՐԺՈՒՄՆԵՐԸ ԵՎ ՀԱՅ ԳԱՂ-
ԽԱՎԱՅՐԵՐԸ (Հոգվածների ժողովածու), Հեծ ԳԱ Հրատարակչություն, Երե-
վան, 1988, 228 էջ:

Հայ դադթավայրերի պատմությանը նվիրվել են բազմաթիվ հետաքրքիր ուսումնասիրու-
թյուններ. Բնական է, որ սկզբում պատմաբանների աշխատանքը պետք է ընթանար առանձին
դադութների հետադոման ճանապարհով: Սակայն կուտակված գիտական նյութը հնարավո-
րություն է ընձեռում դադթավայրերի կամ գոնե դրանց ոեզիոնալ խմբերի օրինաչափություն-
ների համադրական քննության համար: Այդպիսի աշխատանք է գրախոսվող ժողովածուն, որ-
տեղ փորձ է արվում դիտարկել հայկական դադթավայրերի պատմությունը որոշակի կտր-
վածքով՝ թուրքական և պարսկական լծի դեմ հայ ազատագրական պայքարի տեսանկյունով:
Ժողովածուի առաջաբանում Հեծ ԳԱ թղթակից անդամ Վ. Բ. Բարխուդարյանը, հետա-
դարձ հայացք նետելով դադութահայության պատմության ուսումնասիրման ամբողջ պրոցեսի
վրա, ներկայացնում է դրա հիմնական փուլերը, իրավացիորեն նշելով, որ ամայն 1950-ա-
կան թթ. կեսերից զաղափարական աշխատանքներում եղած թերությունները վերացնելու, ան-
հատի պաշտամունքի քննադատության շնորհիվ ստեղծված բարենպաստ մթնոլորտում, հնա-
րավորություն ստեղծվեց անդրադառնալ պատմագիտության կողմից անտեսված շատ պրո-
լեմների, շրջադարձ կատարվեց նաև դեպի գաղութահայության պատմության հարցերը:
20-ական թվականներին Հայաստանում առկա էր և՛ քաղաքական, և՛ գիտական հետաքրքրու-
թյուն հայկական սփյուռքի հանդեպ, սակայն այն կասեցվեց ստալինիզմի ժամանակաշրջա-
նում և նորից կյանքի կոչվեց անհատի պաշտամունքի մերկացման խրուշչովյան քաղաքա-
կանության տարիներին ու շարունակվեց մինչև մեր օրերը: Հայ գիտնականների կատարած
մեծ աշխատանքի արգասիքը եղավ այն, որ սկսվեց ստեղծվել հայ դադթաշխարհի պատմու-
թյունը և պատմական դիտությունը հարստացավ բազմաթիվ արժեքավոր աշխատություն-
ներով:

Գրախոսվող ժողովածուի հոգվածների զգալի մասը վերաբերում է ռուսահայ դադթօջախ-
ներին: Մեծ հետաքրքրություն է ներկայացնում Վ. Կ. Ոսկանյանի՝ «Հայ ազատագրական
շարժման ռուսական կողմնորոշման սկզբնավորման պատմությունից (15—18-րդ դդ. սկիզբ)»
հոդվածը: Հեղինակի ուսումնասիրությունները հայ ազատագրական շարժման ռուսական կողմ-
նորոշման վերաբերյալ վաղուց հայտնի են ընթերցողին: Սույն հոդվածը գիտնականի՝ տաս-
նամյակների ընթացքում կատարած որոնումների և ուսումնասիրությունների արդյունքն է:
Հետևելով հայ-ռուսական պատմական կապերին, Վ. Ոսկանյանը իր հայտնաբերած բազմա-
թիվ նորահայտ աղբյուրների հիման վրա հանդում է այն համոզիչ եզրակացությանը, որ հայ
ազատագրական շարժման ռուսական կողմնորոշման ձևավորման պրոցեսը սկսվել է 15-րդ
դարի կեսից, ծավալվել 16—18-րդ դարերում, դառնալով համաժողովրդական քաղաքական
ծրագիրը (էջ 21—22):

Հայ ընթերցողին և պատմաբաններին հայտնի են նաև Վ. Ա. Խաչատրյանի ուսումնա-
սիրությունները՝ նվիրված Աստրախանի հայ գաղութի պատմությանը: Ժողովածուում հրա-
պարակած նրա հոդվածը՝ «Հայ ժողովրդի ազատագրական շարժումները և Աստրախանի հայ
գաղութը 18-րդ դարում», կառուցված է արխիվներում և հատկապես Մաշտոցի անվան Մա-
տենադարանում հեղինակի ուսումնասիրած արխիվային նոր նյութերի հիման վրա և այդ տե-
սականտից չափազանց ուշագրավ է: Գաղութի կյանքին և պատմությանը վերաբերող բազմա-
թիվ ազգային և սոցիալական գործոնները առանձին վերլուծելով, նա դրանք գիտում է կա-
պի մեջ և գտնում, որ Աստրախանում տեղի է ունեցել մի շարք պատմական, տնտեսական,
քաղաքական, կրոնական և այլ գործոնների բարենպաստ զուգակցում (էջ 140), որով Աստ-
րախանի հայ գաղթօջախը որակապես տարբերվել է մի շարք այլ գաղութներից և որով պայ-
մանավորված է Աստրախանի գաղութի բացառիկ դերը հայ ազատագրական շարժման մեջ:

Ծանկալի կլինեն, որ Վ. Խաչատրյանը հիշատակեց նաև ռուս մեծ գիտնական և քաղաքա-
կան գործիչ Վ. Ն. Տատյչևի անունը, որը 1741—45 թթ. Աստրախանի նահանգապետն էր, և
մեծ նպաստ էր բերել հայ-ռուսական հարաբերությունների զարգացմանն ու ամրապնդմանը:

Ռուսահայ գաղթօջախներին է վերաբերում նաև ժ. Ղ. Անանյանի «Հայկական գաղթավայրերի հիմնումը Սև ծովի հյուսիսային շրջաններում և հայ ազատագրական շարժումը 18-րդ դարի վերջին երեսնամյակում» հոդվածը։ Անանյանը ուսումնասիրել է բազմաթիվ փաստաթղթեր և հետաքրքիր հետևություններ է անում հայ գաղութների կյանքի մասին, որոնք ըստ նրա նովորոսիայի բնակեցման ու երկրամասի յուրացման ուղղությամբ Ռուսաստանի պետական քաղաքականության էությունը։ Մատենագրությանը և այլ արխիվներից քաղված նյութերի հիման վրա հեղինակը վերլուծում է լազարյանների, Հովսեփ Արղությանի, «Արարատյան դեսպան» Ստեփան Դավթյանի գործունեությունը և եզրակացնում, որ հայերի վերաբնակեցումը Ռուսաստանում նրանք դիտում էին որպես հայկական ապագա ինքնուրույն պետություն ստեղծելու ծրագրի մի մաս։ Սա հետաքրքիր և ուշադրության արժանի տեսակետ է։

Հյուսիսային Կովկասի հայկական գաղթավայրերի և հայ-ռուսական հասարակական-քաղաքական հարաբերությունների համակարգում նրանց դերին է նվիրված Լ. Ա. Պողոսյանի ուսումնասիրությունը։ Հեղինակը ճիշտ է նկատում, որ Պետրոս Մեծի իրանական արշավանքը «շրջադարձային եղավ Կովկասյան ժողովուրդների կյանքում» (էջ 155) և ազդակ հանդիսացավ նաև Հյուսիսային Կովկասի հայկական գաղթավայրերի առաջացման համար։ Լ. Պողոսյանը հատուկ ուշադրություն է դարձնում Կովկասում թուրքական ագրեսիայի լուսաբանմանը, նկատելով, որ հայ ազատագրական շարժման գործիչները, դաշնակցելով Ռուսաստանի հետ, հետպահում էին նաև թուրքական ագրեսիայի կանխման նպատակով։ Հաջորդությամբ համակարգելով այդ գաղութներին վերաբերող ցրված բազմաթիվ նյութերը, հեղինակը տալիս է Գերբենդի, Ղլչարի, Սուրբ Խայի, Մոզդոկի, Գեորգիևսկի և այլ վայրերի գաղթօջախներին՝ ձևավորական և դրանց ազգային ու սոցիալ-տնտեսական կյանքի պատմությունը, հատկապես առանձնացնելով դրանց դերը հայկական ազատագրական շարժման մեջ։ Նշելով նշված գաղթավայրերի աշխարհագրական դիրքից, Լ. Պողոսյանը հանգում է այն ճիշտ հետևությանը, որ դրանք «միջանկյալ, կապող օղակ են հանդիսացել Ռուսաստանի, այնտեղ բնակվող հայ համայնքների և Անդրկովկասի՝ մասնավորապես մայր Հայաստանի միջև» (էջ 168)։

Վ. Բ. Բարխուդարյանը «Ռուսաստանի և Հնդկաստանի հայկական գաղութները 18-րդ դարի վերջին քառորդի հայ ազատագրական շարժումներում» հոդվածում չի անդրադառնում այդ գաղութների պատմության արդեն ուսումնասիրված հարցերին, քննում է միայն Ռուսաստանի և Հնդկաստանի հայ գաղթօջախների համագործակցության պրոբլեմը հայ ազատագրական շարժումներում։ Նշելով ռուսահայ և հնդկահայ գաղութների առանձնահատկությունները, դրանց առաջացման և զարգացման միանգամայն տարբեր բնապատմական պայմանները, նա ուսումնասիրության շնորհ տեղափոխում է երկու գաղութների համար բնորոշ ընդհանուր գծերին՝ հայ ազատագրական պայքարի վրա, ընդգծելով, որ «բոլորն էլ Ռուսաստանի հետ էին կապում հայկական պետականության վերականգնումը» (էջ 192)։ Սերտորեն շաղկապելով հնդկահայերի ազատագրական քաղաքադատականությունը եվրոպական լուսավորականության հետ, հեղինակը ցույց է տալիս, թե ինչպես էր դրսևորվում հնդկահայ քաղաքադատականության դեմոկրատական ոգին ռուս-հնդկահայ հարաբերություններում և Հայաստանի ազատագրման, ծրագրերում։ Ճիշտ տարբերակելով ռուսահայերի և հնդկահայերի ազատագրական շարժման սոցիալական ոգին, միևնույն ժամանակ նշում է դրանց մի շարք ընդհանրությունները։ ձգտումը՝ լուսավորել և ինքնաճանաչման բերել ժողովրդին և համախմբել նրան ազատագրական պայքարում։ Հետաքրքրական են հնդկահայ գաղութի կողմից ռուսահայ գաղութներին ցույց տրվող օգնությանը նվիրված էջերը, ինչպես նաև՝ Ղ. Արղությանի և Շահամիր Շահամիրյանի գործարար կապերին վերաբերող փաստաթղթերը։

Ընդհանուր առմամբ կարելի է ասել, որ Վ. Բարխուդարյանի այս հոդվածով բացվում է գաղութահայության ուսումնասիրման մի նոր ասպեկտ՝ տարբեր ռեգիոններում գտնվող գաղթօջախների համադրական, զուգահեռ ուսումնասիրությունը՝ կոնկրետ պրոբլեմային կտրվածքով։

Գրախոսվող ժողովածուում ներկայացված է Վ. Ա. Մարտիրոսյանի «Հայ-վրացական համագործակցությունը 18-րդ դարի 80-ական թվականների ազատագրական պայքարում» հոդվածը, որը նվիրված է 1783 թ. հուլիսի 24-ին Գեորգիևսկ ամրոցում կնքված ռուս-վրացական պայմանագրին, հայ գործիչներին՝ այդ պայմանագրի հետ առնչություններին, ինչպես նաև՝ ողջ վրացահայության վերաբերմունքին։

Ըստ Վ. Մարտիրոսյանի, վերահայությունը «լիովին հարեց Ռուսաստանի հովանավոր-

րության ներքո անցնելու կողմնակիցների բանակին» (էջ 218), և այդ միտքը համողիչ ապացուցվում է քննվող պատմական փաստաթղթերի հիման վրա: Հայ-վրացական հարաբերությունները, Հևրակի թաղավորի ճկուն քաղաքականությունը հեղինակը դիտարկում է Թուրքիայի, Պարսկաստանի, Անդրկովկասի խառնությունների ու վրաստանի հարաբերությունների բարդ համախառնում, րացահայտելով ժամանակին հատուկ կնճռոտ երևույթները, մասնավորապես՝ Ղարաբաղի Իրրահիմ խանի և այլ գործիչների երկդիմի վարքագիծը: Այն հանգամանքը, որ հեղինակը, լավ տիրապետելով վրացերենին, օգտագործել է բաղմաթիվ վրացական աղբյուրներ, սովորել է բարձրագույն դրախտավող հոգվածի արժեքը:

Ժողովածուում իր ուրույն տեղն ունի և կարևոր դիտական հետաքրքրություն է ներկայացնում Վ. Ա. Բալուրդյանի «Հայաստանի աղատագրման խնդիրը և չուղահայ առևտրական, բուրժուազիան 16—17-րդ դարերում» հոդվածը: XVI դ. հայ առևտրական դասի նոր վերելքն ու ղերչ միադղային առևտրի մեջ, որը, կարելի է համարել, «հայ առևտրական կայսրության» ստեղծում, հեղինակն իրավացիորեն շաղկապում է Թուրքիայի՝ Կոստանդնուպոլսի գրավումից հետո ստեղծած նոր միջադղային իրադրության, աշխարհագրական նոր հայտնադործումների, առևտրական նոր ճանապարհների բացման, ինչպես նաև հայ ժողովրդի համար ստեղծված ծանր պայմանների հետ: Թուրք-իրանական առևտրատնտեսական ֆոնի վրա տալով շուրջահայ առևտրականների նկատմամբ Շահ-Աբբասի քաղաքականության վերլուծությունը, հեղինակը ցույց է տալիս ոչ միայն նրանց լայն առևտրական գործունեությունը, այլև քաղաքական ակտիվությունը, հակադրվելով մինչ այժմ գրականության մեջ իշխող թեզին՝ չուղահայ առևտրական դասի պասիվությանը (XVII—XVIII դդ.):

Համամիտ ենք հեղինակի այն կարծիքին, որ հայ աղատագրական միտքը ամենից վաղ ծնունդ է առել առևտրական բուրժուազիայի խոշալության շրջանում: Հենց այս դասն է, որ, աստիճանաբար համակվելով հայ բնաշխարհին ազատագրելու տրամադրություններով, սկսում է տոն տալ նաև այդ նպատակով ձեռնարկվող բանակցություններին» (էջ 99): Այս թեզը, հեղինակի այս նոր մոտեցումը, կարևոր նշանակություն ունի մեր ազգային-աղատագրական պայքարի պատմության ճիշտ ըմբռնման համար:

Իհարկե, երբ հայ առևտրական կապիտալը թևակոխեց իր զարգացման առևտրաարդյունաբերական փուլը, դա բոլորովին նոր որակ տվեց նրա քաղաքական վարքագծին, սակայն XVI—XVIII դդ. հայ առևտրական կապիտալի ներկայացուցիչներին լացրածակ քաղաքական անտարբերություն վերագրելը, ըստ ամենայնի, սխալ է: Նշելով իրանահայ վաճառականության երկակի դրությունը այդ ժամանակաշրջանում (տնտեսական համամատական ազատությունն ու շահերի զուգահեռումը իրանի տնտեսական շահերին և կրոնական ու ազգային ճնշման տակ զտնվելը, վաճառականի անձի և սեփականության ապահովության բացակայությունը), հեղինակը դաշիս է տրամաբանական հետևություն. իրանահայ առևտրավաշխատական բասը չէր կարող դժգոհ չլինել իրանական ավատական լծից և չհասկանալ, որ հայ ժողովրդի թշվառ դրությունը հետևանք է սեփական պետականության բացակայության (էջ 105):

Հեղինակի օգտագործած եվրոպական ճանապարհորդների՝ Տավերնիեի, Տուրնեֆորի, Շարդենի աշխատությունները, ինչպես նաև ֆրանսերեն, անգլերեն և այլ լեզուներով բերված աղբյուրներն ու լաղմազան գրականությունը ավելի են հարստացնում այս արժեքավոր ուսումնասիրությունը:

Ա. Ծ. Քոլանջյանի «Հայազգի գործիչների մասնակցությունը միջնադարյան Մոլդովայի և Վալախիայի ժողովրդների հակաօսմանյան պայքարին» (XV—XVIII դդ.)» ուսումնասիրությունը կառուցված է բաղմաթիվ հայկական, ռումինական և ուսական և այլ աղբյուրների, ինչպես նաև բաղմալեզու հարուստ գրականության հիման վրա և նվիրված է հայազգի գործիչների մասնակցությունը ռումին ժողովրդի հակաօսմանյան պայքարին: Հեղինակը համոզիչ ցույց է տալիս հայ բնակչության ծանր վիճակը Վալախիայում և Մոլդովայում օսմանյան լծի տարիներին և նրա համատեղ պայքարը ռումին ժողովրդի հետ օսմանյան զավթիչների դեմ: Ա. Քոլանջյանն ուսումնասիրել է հակաօսմանյան պայքարի գործում բաղմաթիվ հայազգի գործիչների մեծ ավանդը: Ուշադրության արժանի են Իսրայել Օրու մասին բերված տվյալները և հեղինակի այն հզորակցությունը, որ Օրու ուղևորությունները Մոլդովա և Վալախիա որոշակի դեր են խաղացել տեղի «հայերի հայրենասիրական տրամադրությունների էլ ավելի կայունացման գործում» (էջ 86), ինչպես նաև նորահայտ վավերագրերի հիման վրա բերված տվյալները այն մասին, որ մոլդովահայերը ցանկանում էին ակտիվորեն մասնակ-

ցել Հայաստանի ազատագրական շարժմանը՝ Ս. Քոլանջյանի հոգովածը արժեքավոր ներդրում է հայ-ռուսական բարեկամության ուսումնասիրման գործում:

Է. Խ. Թաշիրյանը «Հոլանդահայ գաղութը և հայ ազատագրական միտքը (XVII դ.)» հոգովածում վերլուծելով հոլանդահայ գաղութի ստեղծման նախադրյալները և նրա պատմության համառոտ ակնարկը, շեշտը դնում է գաղութի հոգևոր կյանքի վրա, առանձնացնելով նրա դերը հայ ազատագրական մտքի պատմության մեջ: Այդ տեսանկյունով քննելով գաղութի պատմությունը, Թաշիրյանը հետապնդում է համայնքի բոլոր խավերի մասնակցությունը հայկական տպարանի և տպագրության ազգանվեր գործին, որը կապված էր Ոսկան Նրևանցու, Վանանդեցիների և ականավոր այլ գործիչների անվան հետ: Հեղինակն ընտրել է ուսումնասիրման երկու կարևոր տեսանկյուն, նախ՝ հանգամանորեն վերլուծում է հայ դրականության մեկուսացման արժեքների հրատարակությունը, որն, իրավացիորեն նպաստել է ժողովրդի ազատագրական պայքարի ոգու պահպանմանը և երկրորդ՝ մեկնաբանում է Վանանդեցիների և հոլանդահայ գաղութի այլ ներկայացուցիչների ազատագրական հայացքներն ու գործունեությունը: Հետաքրքիր է նաև ղմյուռնահայ Ապրոյան եղբայրների և Պետրոս Մեծի միջև եղած կապերի լուսաբանումը և այդ առիթով բերված փաստաթուղթը: Անհրաժեշտ ենք համարում, սակայն, նշել, որ Պետրոս Մեծի և Ռուսաստանի հետ Ապրոյան եղբայրների, ինչպես և Հոլանդիայում գործող այլ վաճառականների հարաբերությունների մասին բազմաթիվ ուշագրավ նյութեր կան XVIII դ. ռուս պատմաբաններ Մ. Դ. Չուլկովի, Ի. Գոյիկովի աշխատություններում և ռուսական սկզբնաղբյուրներում, որոնք նույնպես կարելի էր օգտագործել հարցի լուսաբանման համար:

Վերին աստիճանի ուշագրավ են հոլանդահայ գործիչներին և Խարայել Օրու առնչություններին վերաբերող փաստաթղթերը, որոնք հաստատում են հեղինակի եզրակացությունը, որ Օրու ռուսական կողմնորոշման ձևավորման մեջ փոքր չի եղել նաև հոլանդահայ գաղութի որոշ ներկայացուցիչների» (էջ 133) դերը և որ «հոլանդահայ գաղթօջախի ներկայացուցիչները ևս անմաւն չեն մնացել 17—18-րդ դդ. հայ ազատագրական շարժումների նախապատրաստմանը» (էջ 134):

Ձնայած հոգովածների թեմատիկ տարբերությանը, ժողովածուն ունի մեկ ընդհանուր գաղափար. դա հայ ժողովրդի ազատագրական պայքարն է թուրքական և իրանական լծի դեմ՝ և այդ պայքարի ռուսական կողմնորոշումը:

Վ. Բ. Բարխուդարյանը, առաջաբանում նշելով ռուսահայ գաղութների արտակարգ դերը մեր ազատագրական պայքարում և գաղութահայ գործիչների ռեալիզմը, որի հետևանքով նրանք որդեգրեցին ռուսական կողմնորոշում, ընդգծում է, որ այն «աստիճանաբար հասունացավ, խորացավ և դարձավ հայ ժողովրդի ազատագրման միակ հուսալի և ռեալ ուղին» (էջ 13):

Վ. Ա. Խաչատրյանը, խոսելով հայ եկեղեցու դիրքորոշման մասին, գրում է. «Հայ եկեղեցու բարձրաստիճան գործիչները, էջմիածնի կաթողիկոսի գլխավորությամբ, ավելի պարզ գիտակցեցին հայ-ռուսական հարաբերությունների զարգացման բախտորոշ նշանակությունը» (էջ 148):

Վ. Կ. Ոսկանյանը բացահայտում է հայ-ռուս բարեկամության հիմքը, շեշտելով, որ այս արտահայտում էր «կողմերի օբյեկտիվ շահերը» (էջ 29) և զննատելով այդ հարաբերությունները, գրում է. «Վրաստանի և ապա Արևելյան Հայաստանի՝ Ռուսաստանին միանալը դարձավ պատմական մեծ, բախտորոշ և առաջադիմական իրողություն: Որի հսկայական նշանակությունը ավելի տեսանելի է դարձել այժմ՝ 160 տարի հետո» (էջ 45): Նույն ողով է արակվում ազատագրական պայքարի ռուսական կողմնորոշումը ամբողջ գրքում:

Մենք ապրում ենք վերակառուցման, նոր մտածելակերպի, դեմոկրատիայի և պլուրալիզմի մի ժամանակաշրջան, երբ վերանայվում են անցյալի քարացած դոգմաները, երբ ուսումնասիրողներին չեն պարտադրում ստանդարտ, ստերեոտիպ և պաշտոնական կարծիքներ, երբ պատմաբանը կարող է անկաշկանդ շարադրել այն, ինչ թելադրում են իր միտքը և խիղճը: Ժողովածուի հեղինակները, որոնք երկար տարիներ զբաղվել են հայ-ռուսական հարաբերությունների ուսումնասիրմամբ, այսօր վերահաստատում են իրենց հիմնական եզրակացությունները, դրանով իսկ ընդգծելով, որ իրենք անցյալում էլ հիմնվել են պատմական օբյեկտիվ ճշմարտությունների վրա: Նրանց եզրակացությունները հիմնված են ոչ միայն համոզիչ փաստերի և վերլուծությունների, այլև մեր մեծերի թողած իմաստուն ժառանգության և ավանդույթների վրա: Ժողովածուն ամբողջությամբ վերցրած ուշագրավ և արժեքավոր աշխատություն է:

Ռ. Հ. ԽԱՉԱՏՐՅԱՆ

Պատմական գիտությունների դոկտոր